

BAB KEDUA

RIWAYAT HIDUP IBN QAYYIM DAN SUASANA ZAMANNYA

2.1 Kelahirannya

Ibn Qayyim atau nama penuhnya Syamsuddin Abu Abdullah Muhammad bin Abu Bakr bin Ayyub bin Hariz al-Zar'ie.¹ Beliau lebih terkenal dengan gelaran Ibn Qayyim al-Jawziyyah atau Ibn Qayyim sahaja.² Menurut Abu Hassan 'Alī 'al-Hasanī al-Nadwī, nama sebenarnya ialah Muhammad, gelarannya Syamsuddin dan nama samarannya Abdullah. Ia berketurunan Zar'ie.³

¹ Abu al-Falah Abd 'al-Hayyī b. al-'Imād al-Hanbali Ibn 'Imād, *Syadharāt al-Dhahab fī Akhbār min al-Dhahab*, Qaherah: Maktabah al-Qudsi, 1351 H, Juz. 6, hal. 169. Lihat juga Khairuddin al-Zarkālī, *al-A'lam*, Beirut: Dār al-'Ilm Lil Malayīn, cet. 4, 1979 M, Juz. 6, hal. 56.

² Gelaran ini adalah mengambil sempena peranan bapanya sebagai salah seorang pengasas Madrasah al-Jawziyyah di Damsyik yang diasaskan oleh Muhyiddin b. al-Hafiz Abi al-Farj b. al-Jawzi. Meninggal dunia tahun 656 H. Madrasah ini telah diasaskan pada tahun 652 H dan kemudiannya terbakar pada tahun 820 H tetapi telah dibina semula oleh Syamsuddin al-Nablūsi. Madrasah ini juga pernah dijadikan sebagai Mahkamah pada tahun 1327 H. Madrasah ini telah terbakar kali kedua pada tahun 1925 M iaitu sewaktu berlaku 'Peperangan Syria' antara tentera Islam dengan tentera Perancis. Ianya telah didirikan semula dan sekarang telah didirikan sebuah mesjid kecil di atas tapaknya yang asal yang dikenali dengan *Hayyi al-Bazuriyyah*. Lihat Bakr b. Abdullah Abu Zaid, *Ibn Qayyim al-Jawziyyah Hayātuhu wa Athāruhu*, al-Riyadh: al-Hilāl, cet. 1, 1980, hal. 13. Lihat juga Abd 'Azim Abdul Salam Syarifuddin, *Ibn Qayyim al-Jawziyyah 'Aṣruhu wa Manhajuhu wa Araḥu fī al-Fiqh wa al-'Aqāid wa al-Tasawuf*, Cet. 2, al-Qaherah: Maktabah al-Kulliyah al-Azhariyyah, 1962 M/1387 H, hal. 6.

³ Abu al-Hasan 'Alī al-Hasanī al-Nadwī, *Rijāl al-Fikr wa al-Da'wah fī al-Islam bi Hayah Syeikh al-Islam al-Hafiz Ahmad Ibn Taimiyyah*, al-Kuwait: Dār al-Qalam, Cet. 6, 1983, Juz. 2, hal. 316.

Ibn Qayyim al-Jawziyyah dilahirkan pada 7 Safar 691 H bersamaan dengan 20 Januari 1292 M di kampung Zar'ie⁴, Damsyik, Syria. Dengan ini bererti, beliau dilahirkan pada akhir kurun ke tujuh H atau dalam kurun ke 13 M. Bapanya bernama Abu Bakr bin Ayyub bin Sa'ad bin Hariz al-Zar'ie adalah merupakan pengasas dan tenaga pengajar di Madrasah *al-Jawziyyah*, Damsyik. Bapanya terkenal sebagai seorang yang kuat beribadah serta pakar dalam ilmu faraid. Bapanya telah meninggal dunia pada malam Ahad 19 Zulhijjah 723 H di Madrasah *al-Jawziyyah* dan disembahyangkan selepas zuhur di Masjid Jami', bandar Damsyik, Syria. Jenazahnya telah dikebumikan di makam *Bāb al-Ṣaghīr*, Damsyik.⁵ Ini bererti Ibn Qayyim berusia 32 tahun sewaktu ayahnya meninggal dunia.

Adiknya bernama Zainuddin atau nama penuhnya Abu al-Farj Abdul Rahman bin Abu Bakr. Dilahirkan pada tahun 693 H, iaitu dua tahun terkemudian daripada kelahiran Ibn Qayyim. Beliau meninggal dunia pada malam Ahad 18 Dhulhijjah 769 H di Damsyik iaitu lapan belas tahun selepas kematian Ibn Qayyim. Beliau juga turut belajar bersama-sama dengan abangnya Ibn Qayyim dan berguru kepada beberapa orang guru.⁶

⁴ Sekarang dikenali dengan nama *Azra'* dan terletak 55 batu ke tenggara bandar Damsyik, Syria. Lihat Abd. 'Azim Abd. Salam Syarifuddin, *op.cit.*, hal. 68)

⁵ Bakr b. Abdullah Abu Zaid, *Ibn Qayyim al-Jawziyyah Ḥayātuhu wa Athāruhu*, hal. 21. Lihat juga Sidek b. Hassan al-Qanuji, *Abjad al-'Ulūm*, Beirut: Dār al-Kutub al-Ilmiah, 1989, Juz. 3, hal. 143.

⁶ Jenazah abang Ibn Qayyim dikebumikan di makam *al-Bāb al-Ṣaghīr*, Damsyik. Lihat Bakr b. Abdullah Abu Zaid, *Ibid.*, hal. 22

Ibn Qayyim mempunyai dua orang anak iaitu Abdullah dan Ibrahim. Kedua-dua orang anaknya ini terkenal alim dan amat cintakan ilmu pengetahuan. Abdullah atau nama penuhnya Syarifuddin Abdullah dilahirkan pada tahun 723 H dan meninggal dunia pada tahun 756 H. Beliau seorang yang terkenal dengan kecerdikannya. Contohnya, beliau mampu menghafal Surah *al-A`raf* dalam masa dua hari dan telah menghafal al-Quran sejak berusia sembilan tahun. Beliau telah menggantikan ayahnya mengajar di Madrasah *Sadriyyah*, Damsyik setelah ayahnya meninggal dunia.⁷

Ibrahim atau nama penuhnya Burhanuddin Ibrahim dilahirkan pada tahun 716 H dan meninggal dunia pada tahun 767 H. Beliau terkenal sebagai seorang pakar dalam bidang nahu, hadith dan ilmu fekah. Antara kitab tulisannya berjudul *Alfiah Ibn Malik*. Kedua-dua beradik ini turut belajar ilmu faraid dengan ayahnya Ibn Qayyim.⁸

Latar belakang ringkas keluarga Ibn Qayyim ini jelas menggambarkan sebuah keluarga yang cintakan ilmu pengetahuan. Aspek pendidikan dan keilmuan diberikan keutamaan oleh mereka.

⁷ Ibn Kathir, 'Imaduddin Abi al-Fida' Ismail Ibn 'Umar Ibn Kathir al Qurasyi al-Dimasyqi, *al-Bidayah wa al-Nihayah*, Maṭba'ah al-Sa'adah, t.t., Juz. 14, hal. 235.

⁸ al-Qanuji, *Abjad al-'Ulum*, Juz. 3, hal. 143.

2.2 Pendidikan Ibn Qayyim

Pada peringkat awal, Ibn Qayyim mendapat pendidikan daripada ayahnya Abu Bakr bin Ayyub di Damsyik. Beliau telah mempelajari ilmu faraid daripada ayahnya. Pada ketika itu ayahnya memang terkenal sebagai seorang yang pakar dalam ilmu faraid.⁹

Kemudian Ibn Qayyim meneruskan pengajiannya dalam bidang hadith dengan al-Syihab al-Nablusi atau nama penuhnya Abu al-'Abbas Ahmad bin Abdul Rahman bin Abd. Mun'em bin Ni'mah al-Muqaddasi al-Nablusi.¹⁰ Sekiranya dikira antara tarikh kelahiran Ibn Qayyim pada tahun 691 H dan tarikh kematian al-Nablusi pada tahun 697 H, maka dapat dirumuskan bahawa Ibn Qayyim telah mula belajar dengan al-Nablusi sejak usianya antara 6 hingga 7 tahun.

Dalam bidang ilmu hadith, Ibn Qayyim juga telah belajar dengan beberapa guru yang lain antaranya ialah :

- i. Al-Qaḍi Qudāh Taqiyuddīn Abu Fadl atau nama penuhnya Taqiyuddīn Abu Fadl Sulaiman bin Hamzah bin Ahmad bin 'Umar bin Abī 'Umar bin Ahmad bin Muhammad bin Qudamah al-Muqaddāsi al-Ṣolihi al-Hanbālī.¹¹

⁹ Muhammad Muslim al-Ghunaimi, *op. cit.*, hal. 102.

¹⁰ Zainuddin Abu al-Farj Abd. Rahman b. Syihabuddin Ahmad al-Baghdadi, Ibn Rajab, *al-Dhail 'ala Tabaqat al-Hanabilah*, Beirut: Dār al-Ma'rifah, t.t., Juz. 2, hal. 336 - 338.

¹¹ Ibn 'Imād, *Ṣyadharāt al-Dhahab*, Juz. 6, hal. 364 - 366.

- ii. Abu Bakr bin Abd. Daim. Nama penuhnya Abu Bakr bin Munzir bin Zainuddin Ahmad bin Abd. al-Daim bin Ni'mat al-Muqaddasi al-Hanbali.¹²
- iii. 'Isa al-Ma'am atau nama penuhnya Syarifuddin 'Isa bin Abdul Rahman bin Ma'ali bin Ahmad al-Salibi al-Mut'am.¹³
- iv. Ismail bin Makhtum atau nama penuhnya Sadruddin Abu al-Fida' 'Ismail bin Yusuf bin Makhtum bin Ahmad al-Qissi al-Dimasyqi.¹⁴
- v. Fatimah Bt. Jauhar atau nama penuhnya Fatimah Ummu Muhammad bin al-Syeikh Ibrahim Ibn Mahmud bin Jauhar al-Bathaihi al-Ba'li.¹⁵

Ibn Qayyim juga pernah belajar ilmu nahu Arab daripada guru-guru yang berkaliber, antaranya :

- i. Majduddin atau nama penuhnya Majduddin Abu Bakr bin Muhammad bin Qasim al-Tunisi al-Syafe'i. Beliau terkenal sebagai pakar dalam tatabahasa Arab. Ibn Qayyim telah mempelajari kitab *al-Muqarrab* daripadanya.¹⁶
- ii. Muhammd al-Fath bin Abi al-Mufaddil al-Ba'li. Nama penuhnya Syamsuddin Abu Abdullah Muhammad bin Abi al-Fath bin Abi al-Fadl al-Ba'li. Beliau terkenal sebagai pakar dalam tatabahasa Arab dan Ilmu Hadith serta ahli fekah mazhab Hanbali. Ibn Qayyim telah mempelajari kitab-kitab tatabahasa

¹² *Ibid.*, hal. 48.

¹³ *Ibid.*, hal. 52.

¹⁴ *Ibid.*, hal. 38.

¹⁵ *Ibid.*, hal. 28.

¹⁶ Salahuddin b. Khalil b. Aibak al-Safadi, *al-Wafi Bi al-Wafiat*, Istanbul: Matba'ah Zarah al-Ma'arif, 1949, Juz. 2, hal. 271.

Arab daripadanya seperti kitab *al-Mulakhas*, *al-Jurjāniah*, *al-Fiah Ibn Mālik*, *al-Kāfiah al-Syāfiah* dan Kitab *al-Tashīl*.¹⁷

Setelah usianya 21 tahun iaitu pada tahun 712 H, Ibn Qayyim mula berguru dengan Ibn Taimiyyah sebaik sahaja kepulangannya dari Mesir. Ibn Taimiyyah dianggap sebagai guru yang paling banyak mempengaruhi idea dan pemikiran Ibn Qayyim. Menurut al-Dāūdī, Ibn Qayyim telah belajar dengan Ibn Taimiyyah dalam bidang ilmu fekah, usul fekah dan ilmu faraid sejak dari usianya 21 tahun hinggalah Ibn Taimiyyah meninggal dunia pada tahun 728 H.¹⁸ Pada masa itu, Ibn Qayyim berusia 37 tahun.¹⁹ Ini bererti Ibn Qayyim telah belajar dengan Ibn Taimiyyah selama 16 tahun.

Sepanjang pengajiannya dengan Ibn Taimiyyah, beliau pernah ditangkap dan dipenjarakan bersama-sama dengan gurunya pada hari Rabu pertengahan bulan

¹⁷ Ibn Rajab, *op. cit.*, hal. 356 - 357.

¹⁸ Syamsuddin Muhammad b. 'Alī Ibn Ahmad al-Dā'ūdī, *Ṭabaqāt al-Mufasssirin*, Maktabah Wahbah, cet. 1, 1972, Juz.2, hal. 91. Lihat juga Jalaluddin Abd. Rahman al-Sayuti, *Bughyah al-Wu'āt*, Tahqiq : Mohammad Abu Fadl Ibrahim, Dār al-Fikr. cet. 2, 1979, Juz. 1, hal. 62.

¹⁹ Ibn Kathīr, *al-Bidāyah Wa al-Nihāyah*, Juz. 14, hal. 234.

Sya'aban tahun 726 H²⁰. Beliau hanya dibebaskan dari penjara Damsyik selepas kematian gurunya Ibn Taimiyyah pada tahun 728 H²¹.

Menurut Ibn Rajab, semasa berada di dalam tahanan, Ibn Qayyim telah menghabiskan masanya dengan membaca al-Quran dan menganalisa isi kandungannya. Dari peristiwa ini, menyebabkan beliau memperolehi kematangan intelektual dan keperibadian yang lebih baik. Ibn Rajab juga menyatakan penahanannya itu juga telah mempengaruhi keupayaannya dalam menghasilkan karya-karya penulisan yang lengkap²².

Menurut Puteh Ishak, suasana penjara yang tidak kelam-kabut dengan sifat dan ragam manusia, telah memberi peluang kepada Ibn Qayyim untuk mempelajari dan mendalami segala ilmu pengetahuan yang ada pada Ibn Taimiyyah dengan sedalam-dalamnya²³.

²⁰ Sebab-sebab beliau dipenjarakan kerana sependapat dengan fatwa-fatwa gurunya yang bercanggah dengan kehendak pemerintah, iaitu :-

- i. Fatwanya dalam masalah talak tiga sekaligus hanya jatuh satu sahaja.
- ii. Fatwanya mengharamkan ziarah kubur para nabi dan wali Allah.
- iii. Fatwanya mengharuskan perlumbaan kuda.

Lihat Bakr bin Abdullah Abu Zaid, *Ibn Qayyim al-Jawziyyah Hayatuhu wa Atharuhu*, hal. 42-43.

²¹ Ibn Kathir, *op. cit.*, hal. 123.

²² Ibn Rajab, *op. cit.*, hal. 448.

²³ Puteh bin Ishak, *Ibn Taimiyyah Sejarah Hidup dan Tasawuf*, hal. 51.

Suasana penjara juga telah memberi peluang kepada Ibn Qayyim untuk mengenali keperibadian gurunya. Beliau melihat bagaimana gurunya menghabiskan masa di penjara untuk beribadat kepada Allah, membaca serta menulis. Beliau juga turut melihat bagaimana hak gurunya untuk menulis dan membaca telah ditarik dengan sewenang-wenangnya pada hari Isnin, 9 Jamadilakhir tahun 728 H, apabila semua peralatan menulis dan kitab-kitab telah dirampas oleh pihak berkuasa dari penjara Damsyik²⁴.

Ibn Qayyim juga pernah menuntut dengan beberapa orang guru dalam bidang usuluddin dan fekah. Antara guru-gurunya ialah :

- i. Safiuddin al-Hindī atau nama penuhnya Muhammad Safiuddin bin Abdul Rahim bin Muhammad al-Armawi al-Syāfē'ī. Beliau berasal dari India.²⁵ Menurut Ahmad Maher al-Baqārī, sewaktu Safiuddin meninggal dunia, Ibn Qayyim berusia 24 tahun.²⁶
- ii. Syeikh Ismail bin Muhammad al-Ḥarānī. Nama penuhnya Ismail Majduddin bin Muhammad al-Farra' al-Ḥarānī. Menurut Ibn 'Imād, Ibn Qayyim telah membaca dan mempelajari kitab *al-Muqna'* dihadapan gurunya sebanyak seratus kali. Disamping itu beliau juga telah mempelajari kitab fekah

²⁴ Ibn Kathir, *op.cit.*, hal. 134.

²⁵ Khairuddin al-Zarkālī, *al-A'lam*, Beirut : Dar al-Ilm Lil Malayin, cet. 4, 1979, Juz. 7, hal. 72. Lihat juga *Ibid.*, Juz. 14, hal. 74 - 75.

²⁶ Ahmad Maher al-Baqārī, *Ibn Qayyim al-Lughawī*, Iskandariah: Mansya'ah al-Ma'arif, t.t., hal. 28.

berdasarkan kitab *Mukhtasar Abi al-Qāsim al-Kharqī* daripadanya.²⁷ Kitab-kitab lain yang dipelajarinya daripada Syeikh Ismail ialah kitab *al-Raudah* karangan Ibn Qudamah al-Maqḍīsī, kitab *al-Aḥkām* karangan al-Āmidī, kitab *al-Muḥassal*, kitab *al-Maḥṣul* dan kitab *al-Arbāin* karangan al-Rāzī.²⁸

Sepanjang pengajian di Damsyik, beliau juga telah menuntut dengan beberapa orang guru lagi, antaranya ialah :

- i. Ayub Ibn Ni`mat al-Kaḥḥāl atau nama penuhnya Zainuddin Ayyub bin Ni`mat al-Nablūsī al-Dimasyqi al-Kaḥḥāl.²⁹
- ii. Al-Qaḍī Badruddin Ibn Jamā`ah atau nama penuhnya Syeikhul Islam Badruddin Muhammad bin Ibrahim bin Sa`dallah bin Jamā`ah bin Ḥazīn bin Ṣaghīr bin Abdullah al-Kanunī al-Hamawī al-Syafecī.³⁰
- iii. Ibn al-Zamlakani³¹ atau nama penuhnya Kamaluddin Abī al-Ma`alī bin `Alī bin Abd. Wahid bin Abd. Karim bin Khalaf bin Nubhan al-Anṣarī al-Syafecī bin Khatib Zamlakān.³²
- iv. Ibn Mufliḥ atau nama penuhnya Syamsuddin Abu Abdullah bin Mufliḥ bin Muhammad bin Mufarraǵ al-Muqaddasi al-Ṣolihī al-Ramīnī al-Ḥanbalī.³³

²⁷ Ibn `Imād , *Syadharāt al-Dhahab* , Juz. 6, hal . 89.

²⁸ Ibn Qayyim al-Jawziyyah, Syamsuddin Abu Abdullah Muhammad b. Abu Bakr, *Zād al-Ma`ād fi Ḥadiyi Khair al-'Ibād*, Miṣr : Matba'ah Mustafa al-Bābī al-Halabī 1970, Juz. 1, hal . 16.

²⁹ al-Ṣafadī , *al-Wāfi bi al-Wāfiat* , Istanbul : Matba'ah Zarah al-Ma`ārif, 1949, Juz. 2, hal. 271.

³⁰ Ibn `Imād , *op. cit.* , hal. 105 - 106.

³¹ Beliau digelar Zamlakani kerana mengambil sempena nama sebuah kampung berdekatan bandar Damsyik, Syria. Lihat Bakr bin Abdullah , *Ibn Qayyim Ḥayātuhu wa Athāruhu* , hal . 106.

³² Ibn `Imād , *op. cit.* , hal. 78 - 79.

³³ *Ibid* , hal . 199 - 200.

- v. Al-Mazī atau nama penuhnya Yusuf Jamaluddin bin Zakiuddin Abdul Rahman al-Qada'i al-Kalbi al-Dimasyqi al-Syafe'i.³⁴
- vi. Al-Wida' atau nama penuhnya 'Ala'uddin al-Kindi al-Wida'i.³⁵
- vii. Al-Baha' Ibn 'Asakir.³⁶
- viii. Al-Syirazi.³⁷

Berdasarkan keterangan-keterangan di atas, dapatlah dirumuskan bahawa Ibn Qayyim telah mengalami beberapa proses pendidikan iaitu :

- i. Pendidikan yang diterima pada peringkat awal adalah daripada bapanya sendiri di Damsyik.
- ii. Kemudian beliau mendalami lain-lain ilmu daripada para 'ulama' yang terkemuka di Damsyik pada masa itu.
- iii. Guru yang paling banyak mempengaruhi pemikiran Ibn Qayyim ialah Ibn Taimiyah.

³⁴ Ibn Qayyim banyak belajar daripadanya tentang Ilmu Hadith serta Ilmu Rijal Hadith. Pendapat gurunya disebutkan dalam kitab-kitab karangannya dengan sebutan Syaikhuna sepertimana terdapat dalam Kitab *Tuhfat al-Maudud fi Ahkam al-Maulud*. Lihat Bakr b. Abdullah, *op. cit.*, hal. 107.

³⁵ al-Safadi, *op. cit.*

³⁶ *Ibid.*

³⁷ Para sarjana telah berselisih pendapat tentang Ibn al-Syirazi yang menjadi guru Ibn Qayyim. Menurut Abd. Ghani Abd. Khaliq, Ibn al-Syirazi yang menjadi guru Ibn Qayyim ialah Zainuddin Ibrahim Ibn Abdul Rahman Ibn Tajuddin Ahmad Ibn Qadi Abi Naṣr Ibn al-Syirazi. Meninggal dunia tahun 714 H. 'Iwadullah Hijazi pula menyatakan Ibn al-Syirazi yang dimaksudkan ialah Kamaluddin Ahmad b. Muhammad b. Abdullah b. Habitullah b. al-Syirazi al-Dimasyqi. Beliau mengajar di beberapa buah sekolah di Damsyik. Meninggal dunia tahun 736 H. al-Safadi dan Ibn Hajar menyatakan bahawa al-Syirazi yang dimaksudkan ialah Abi Naṣr al-Syirazi sama seperti yang dinyatakan oleh Abdul Ghani Abd. Khaliq. Lihat Ibn 'Imad, *op. cit.*, hal. 33. Lihat juga al-Safadi, *Ibid.*, hal. 271. Lihat juga Syihabuddin Ahmad b. Ali Ibn Ahmad b. Muhammad b. Ali b. Ahmad Ibn Hajar al-'Asqalani, *al-Darar al-Kaminah*, al Hind : Matbu'at Da'irah al-Othmaniah, 1954, Juz. 3, hal. 354. Lihat juga al-Sayuti, *Bughiah al-Wu'at*, Juz. 1, hal. 62.

Pada pandangan penulis, Ibn Qayyim adalah antara 'ulama' yang banyak menerima pendidikan di Damsyik kerana suasana keilmuan yang wujud pada masa itu. Beliau boleh dikatakan tidak mendapat pendidikan secara langsung di bandar-bandar lain.

2.3 Murid-murid Ibn Qayyim

Sebagai seorang 'ulama' yang terkemuka sudah pasti Ibn Qayyim mempunyai ramai murid-murid. Antara murid-muridnya ialah :

- i. Ibn Kathīr atau nama penuhnya Imaduddin Ismail bin 'Umar bin Kathīr bin Zar'ie al-Baṣrī al-Dimasyqī. Seorang 'ulama' yang terkemuka di Damsyik dan telah menulis banyak kitab seperti kitab *al-Bidāyah wa al-Nihāyah*, *Tafsir Ibn Kathīr* dan lain-lain. Dilahirkan pada tahun 700 H dan meninggal dunia pada bulan Sya'ban tahun 774 H. Jenazahnya telah dikebumikan di makam *al-Ṣūfiyah* berdekatan dengan kubur Ibn Taimiyyah di Damsyik.³⁸
- ii. Ibn Rajab al-Ḥanbalī. Nama penuhnya Zainuddin Abu al-Farj Abd. Rahman bin Syibuddin Ahmad bin Rajab Abd. Rahman al-Baghdadī. Pengarang kitab *al-Dhail 'ala Tabaqāt al-Ḥanābilah*. Meninggal dunia pada malam Isnin 4 Ramadhan 795 H. Dikebumikan di tanah perkuburan *al-Bab Ṣaghīr*, Damsyik.³⁹

³⁸ Ibn 'Imād , *Syadharāt al-Dhahab* , Juz. 6, hal. 231 - 232. Lihat juga Ahmad Maḥer al-Baqarī, *Ibn Qayyim min Athāruhu al-'Ilmiyah*, hal. 295.

³⁹ *Ibid* , hal. 339 - 340.

- iii. Ibn Abdul Hādī. Nama penuhnya Muhammad Syamsuddin Abu Abdullah Muhammad bin Ahmad bin Abd. Hādī bin Abd. Hamid bin Abd. Hādī bin Yusuf bin Muhammad bin Qudāmah al-Maqdisī al-Jamā'īlī al-Ṣōlihī. Dilahirkan pada bulan Rejab 704 H dan meninggal dunia pada 10 Jamadil Awwal 744 H. Beliau seorang pakar dalam bidang hadith. Mengarang lebih daripada 70 buah buku. Antaranya kitab berjudul *Tabaqāt al-Muḥaddithin*.⁴⁰
- iv. Syamsuddin Abu Abdullah Muhammad bin Abd. Qādir bin Muhyiddin Othman bin Abd. Ja'far al-Nablūsī al-Ḥanbalī. Dilahir di Nablus dan kemudian berpindah ke Damsyik untuk berguru dengan Ibn Qayyim. Meninggal dunia pada bulan Sya'ban 797 H. Antara kitab tulisannya ialah *Mukhtaṣar Tabaqāt al-Ḥanābilah*.⁴¹
- v. Al-Dhahabī atau nama penuhnya Syamsuddin Abu Abdullah Muhammad bin Ahmad bin Othman al-Turkamānī al-Dhahabī. Dilahirkan pada 473 H dan meninggal dunia pada malam Isnin 3 Zulqaedah 748 H. Banyak menulis kitab dalam bidang hadith.⁴²
- vi. Al-Fayruzabādī atau nama penuhnya Muhammad bin Ya'kub bin Muhammad Muhyiddin Abu Tahir al-Fayruzabādī al-Syafe'ī. Dilahirkan di bandar Qazwan pada tahun 739 H⁴³ dan meninggal dunia pada tahun 817 H di Zubaid.⁴⁴

⁴⁰ Ibn Qayyim al-Jawziyyah, *Hadi al-Arwāh ila Bilād al-Afrah*, Tahqiq: 'Alī al-Syarbiji dan Qāsim al-Nūrī, Muassasah al-Risalah, t.t., hal. 15.

⁴¹ Ibn 'Imād, *op. cit.*, hal. 349.

⁴² *Ibid*, hal. 153 - 155.

⁴³ Ahmad Māher al-Baqarī, *Ibn Qayyim al-Lughawī*, Iskandariah: Mansya'ah al-Ma'arif, t.t., hal. 46.

⁴⁴ Bakr bin Abdullah Abu Zaid, *Ibn Qayyim Hayātuhu wa Athāruhu*, Riyadh: Dār al-Hilal, cet. 1, 1980, hal. 110.

- vii. Al-Muqarī atau nama penuhnya Muhammad bin Muhammad bin Ahmad bin Abi Bakr al-Qurasyī al-Muqarī al-Tilmasāni. Meninggal dunia pada tahun 759 H.⁴⁵
- viii. Al-Ghāzī atau nama penuhnya Muhammad bin Muhammad bin Muhammad bin al-Khidr al-Ghāzī al-Syafe'i. Beliau berketurunan al-Zubair bin al-Awwam. Meninggal dunia pada tahun 808 H.⁴⁶
- ix. Al-Subkī atau nama penuhnya Taqiyuddin Abu al-Hassan 'Alī bin Abd. Kāfī bin 'Alī bin Tamam bin Yusuf bin Muṣawwir bin Siwar bin Salim al-Subkī al-Syafe'i. Dilahirkan pada bulan Safar 683 H dan meninggal dunia pada tahun 756 H di Mesir.⁴⁷ Beliau banyak belajar dengan Ibn Qayyim dalam bidang hadith.⁴⁸
- x. Ibrahim iaitu anak Ibn Qayyim. Beliau pakar dalam bidang nahu dan fekah.⁴⁹ Belajar daripada ayahnya sewaktu berada di Hijaz. Meninggal dunia pada hari Jumaat bulan Safar 767 H sewaktu berusia 48 tahun. Telah dikebumikan di makam *al-Bāb al-Ṣaghīr* berdekatan dengan pusara ayahnya.⁵⁰

⁴⁵ *Ibid.*

⁴⁶ *Ibid.*

⁴⁷ Ibn 'Imād, *Syadharāt al-Dhahab*, Juz. 6, hal. 180 -181.

⁴⁸ *Op. cit.*, hal. 108 - 109.

⁴⁹ Ibn Qayyim, *Zād al-Ma'ād*, Tahqiq: Syu'ib al-Arnūt dan Abd. Qādir al-Arnūt, hal. 22.

⁵⁰ Ibn 'Imād, *op. cit.*, Juz .6, hal. 208.

- xi. Syarifuddin iaitu anak kedua Ibn Qayyim. Belajar daripada ayahnya di Madrasah *al-Ṣadriyyah*, Damsyik. Selepas ayahnya meninggal dunia, beliau telah menggantikannya mengajar di madrasah tersebut.⁵¹

2.4 Karya-karya Ibn Qayyim

Kitab-kitab tulisan Ibn Qayyim adalah banyak dan mempunyai nilai ilmiah yang tinggi. Menurut Tahir Sulaiman Hamūdah, kitab-kitab Ibn Qayyim tidaklah sebanyak kitab-kitab tulisan gurunya Ibn Taimiyyah.⁵² Dari segi bilangannya, penulis tidak dapat mencatatkan tentang berapakah bilangan sebenar karya-karyanya. Menurut al-Zarkālī, beliau telah menyenaraikan sebanyak 30 buah,⁵³ Ahmad Māher al-Baqārī menyenaraikan sebanyak 49 buah⁵⁴, Ibn Hajar al-'Asqalānī menyenaraikan sebanyak 12 buah,⁵⁵ Ibn Rajab sebanyak 42 buah⁵⁶, Ahmad Māher Mahmud al-Baqārī menyenaraikan sebanyak 66 buah,⁵⁷ Fatimah Mahjūb sebanyak 60 buah dan Puteh Ishak menyenaraikan sebanyak 60 buah.⁵⁸ Oleh itu angka yang tepat mengenainya tidak dapat ditentukan. Namun apa yang dirumuskan ialah penulisan beliau adalah melebihi daripada 60 buah.

⁵¹ Ibn Qayyim, *op.cit.*, hal. 22. Lihat juga Bakr b. Abdullah Abu Zajd, *op.cit.*, hal. 108.

⁵² Tahir Sulaiman Hamūdah, *Ibn Qayyim al-Jawziyyah Juhuduhu fī al-Dars al-Lughawī*, Iskandariah : Dar al-Jamī'at al-Misriyyah, t.t., hal. 42.

⁵³ al-Zarkālī, *al-'Alam*, Juz. 6, hal. 56.

⁵⁴ Ahmad Māher al-Baqārī, *Ibn Qayyim al-Lughawī*, hal. 48 - 53.

⁵⁵ Ibn Hajar al-'Asqalānī, *al-Darār al-Kāminah*, Juz. 3, hal. 355.

⁵⁶ Ibn Rajab, *al-Dhail 'Alā Tabaqāt al-Hanābilah*, Juz. 2, hal. 449 - 459.

⁵⁷ Ahmad Māher Mahmud al-Baqārī, *Ibn Qayyim min Athāruhu al-'Ilmiyah*, Iskandariah : Muassasah Syabab al-Jamī'ah, 1987, hal. 186.

⁵⁸ Puteh bin Ishak, *Ibn Taimiyyah Sejarah Hidup dan Tasawuf*, Kuala Lumpur : Dewan Bahasa Dan Pustaka, 1993, hal. 53.

Kitab-kitab tulisan Ibn Qayyim juga meliputi pelbagai disiplin keilmuan, antaranya meliputi bidang `aqidah, fekah, usul fekah, bahasa `arab, tasawuf, akhlak, sejarah kemasyarakatan dan lain-lain. Ibn Rajab mengatakan:

“Karya-karya tulisan beliau sangat banyak serta meliputi pelbagai bidang keilmuan. Dia juga sangat berminat dengan keilmuan samada penulisan, pengkajian dan pembacaan.”⁵⁹

Burhanuddin berkata:

“Dia mempunyai karya penulisan yang sangat banyak dalam pelbagai disiplin keilmuan. Dia juga mempunyai minat yang mendalam terhadap ilmu samada menulis, mengkaji atau mengarang”⁶⁰

Ketinggian gaya bahasa penulisan Ibn Qayyim turut dihargai oleh para `ulama` seperti

Ibn Hajar di mana beliau berkata:

“Beliau adalah seorang `ulama` yang teliti dalam penulisannya dan sentiasa berusaha untuk menulis sesuatu yang memudahkan pembaca memahaminya. Beliau juga memiliki kebolehan yang tersendiri dalam penulisan serta sentiasa mencari perbendaharaan kata dan berusaha supaya penulisannya boleh dijadikan sebagai hujjah”⁶¹

Muhammad bin `Ali al-Syaukānī juga berkata:

“Penulisannya baik dan menarik, jalan ceritanya pula elok dan jarang digunakan oleh penulis-penulis lain. Penulisannya boleh mengasyikkan kefahaman

⁵⁹ Ibn Rajab, *op. cit.*

⁶⁰ Fatimah Mahjūb, *al-Mausū`at al-Islamiyyah*, Qaherah : Maktabah Madbuli, cet. 1, 1991, Juz. 2, hal. 68.

⁶¹ Ibn Hajar, *al-Darār al-Kaminah*, hal. 355.

pembacanya, menyentuh minda serta menusuk hingga ke
lubuk hati para pembacanya⁶²

Penulis membahagikan kitab-kitab tulisan Ibn Qayyim kepada dua jenis iaitu:

1. Menurut bidang-bidang tertentu.
2. Secara umum tanpa merujuk kepada bidang-bidang tertentu.

Menurut bidang-bidang tertentu sebagaimana berikut :

a. Fekah dan Usul Fekah.

1. *I'lam al-Muwaqqi'in `an Rab al-'Alamin.*
2. *Ahkam Ahl al-Dhimmah.*
3. *Al-Turuq al-Hukmiyyah fi al-Siyasah al-Syar'iyyah.*
4. *Al-Furusiyah.*
5. *Al-Solah wa Hukm Tarikhiha.*
6. *Ighathah al-Lahfan fi Hukm Talāq al-Ghadban.*
7. *Nikah al-Muharram.*
8. *Hukm Ighmam Hilal Ramadhān.*

b. Hadith dan Sirah.

1. *Za'ad al-Ma'ad fi Hady Khair al-'Ibad.*
2. *Tahdhib Sunan Abi Daud wa Idhah I'lalu wa Musykilatihi.*

⁶² Ibn Qayyim al-Jawziyyah , *Za'd al-Ma'ad* , Tahqiq: Taha Abd. Ra'uf Taha, hal. 10.

c. 'Aqidah.

1. *Ijtima' al-Juyusy al-Islamiyyah 'ala' Ghazw al-Mu'attilah wa al-Jahmiyyah.*
2. *Al-Sawaiq al-Mursalah 'ala' al-Jahmiyyah wa al-Mu'attilah.*
3. *Syifa' al-'Alil fi Masail al-Qada' wa al-Qadar wa al-Hikmah wa al-Ta'lim.*
4. *Hidayah al-Hayara min al-Yahud wa al-Nasara.*
5. *Hadi' al-Arwah ila' Bilad al-Afrah.*
6. *Kitab al-Ruh.*
7. *Al-Kafiah al-Syafiah fi al-Intisar li' al-Firqah al-Najiah.*

d. Tasawuf dan Akhlak.

1. *Madarij al-Salikin Baina Manazil Iyyaka Na'budu Wa Iyyaka Nasta'in.*
2. *'Uddah al-Sabirin wa Dhakhirah al-Syakirin.*
3. *Jala' al-Ifhām fi al-Solah wa al-Salam 'ala' Khair al-Anām.*
4. *Iqhathah al-Lahfan fi Maka'id al-Syaitan.*
5. *Al-Da' wa al-Dawa'.*
6. *Al-Wabil al-Sawwib min al-Kalam al-Tayyib.*
7. *Tariq al-Hijratin wa Bab al-Sa'adatain.*
8. *Al-Fawaid.*
9. *Miftah Dar al-Saadah wa Manthur Wilayah al-'Ilm wa al-Iradah.*

e. Tafsir.

1. *Tafsir Asmā' al-Qur'an.*
2. *Tafsir al-Fatīhah.*
3. *Tafsir al-Qayyim.*
4. *Tafsir Suwar al-Kāfirūn wa al-Ma'uzataian.*

f. Ilmu Nahu dan Bahasa.

1. *Al-Fawā'id al-Masyuq ilā' 'Ulūm al-Qur'an wa Ilm Bayān.*
2. *Syarh Alfiah Ibn Malek.*

g. Lain-lain Bidang.

1. *Kitāb Safar al-Hijratain wa al-Sa`adataian.*
2. *Marāḥil al-Sa'irin Baina Manāzil Iyyāka Na'budū wa Iyyāka Nasta'in.*
3. *'Aqd Muḥkam al-Ahba' Baina al-Kalam al-Tayyib wa al-'Amal Ṣoleh al-Marfū' ila Rabb al-Samā'.*
4. *Syarh Asmā' al-Kitāb al-'Azīz.*
5. *Zād al-Musafirīn ilā Manāzil al-Su'ada fi Hadyi Khatām al-Anbia.*
6. *Bayān al-Dalīl 'alā Istikhna al-Musābaqah 'an al-Tahlīl.*
7. *Naqd al-Manqūl wa al-Muhikk al-Mumayyizīn al-Mardūd wa al-Maqbūl.*
8. *Al-Qaṣidah al-Numah fi al-Sanah.*
9. *Nuzḥah al-Musytaqīn wa Rauḍah al-Muhibbin.*
10. *Makāid al-Syāitān.*

11. *Rap' i al-Yadaian fī al-Ṣolah.*
12. *Tafdīl Makkah `alā al-Madīnah.*
13. *Uddah al-Ṣābirin.*
14. *Al-Kabāir.*
15. *Nur al-Mu'min wa Ḥayatihī.*
16. *Al-Taḥrīr Fimā Yahil wā Yuḥarram min Libās al-Ḥarir.*
17. *Jawabāt Abd al-Ṣulbān wā Annā Mahum `Alaih Din al-Syaiṭān.*
18. *Butlān al-Kimiya min Arba`in Wajha.*
19. *Al-Firaq Baina al-Khullat wā al-Maḥabbah wā Munāzarah al-Khalil li Qaūmihi.*
20. *Al-Kalām al-Ṭayyib wā al-`Amāl Ṣōleh.*
21. *Al-Faṭḥ al-Qudsī.*
22. *Al-Tuhfah al-Makkiah.*
23. *Amthāl al-Qur'an.*
24. *Syarh al-Asmā' al-Husnā.*
25. *Imām al-Qur'an.*
26. *Al-Masāil al-Ṭarabulusiyyah.*
27. *Al-Ṣirāt al-Mustaqīm fī Ahkām Ahlul al-Jahīm.*
28. *Al-Ta`un.*
29. *Ikhbār al-Nisā'.*
30. *Risālah Ikhtiarāt Taqiyuddin Ibn Taimiyyah.*
31. *Fadl al-`Ilm.*

32. *ʿIlm Bayān.*
33. *Maʿāni al-Adawāt wa al-Hurūf.*
34. *Kasyf al-Ghitāʾ ʿan Hukm Simaʾ al-Ghināʾ.*
35. *Al-Manār al-Munif fī al-Ṣaḥīḥ wa al-Dhaif.*
36. *Al-Risālah al-Tabukiyyah.*
37. *Bayān al-Istidlāl ʿalā Buṭlān Isytirāt Muḥallil al-Sibaq wa al-Nidāl.*
38. *Al-Risālah al-Syafiʿiyyah fī Asrār al-Maʿuzataian.*
39. *Al-Risālah al-Halabiyyah fī al-Tariqah al-Muḥammadiyyah.*
40. *Iqtidāʾ al-Zikr bi Husūl al-Khair wa Dafʿi al-Sarr.*

2.5 Keperibadian dan Akhlak Ibn Qayyim

Kewibawaan Ibn Qayyim al-Jawziyyah sebagai seorang ʿulamaʾ dan pemikir Islam terkemuka dapat dikenali dengan melihat kepada keperibadian dan akhlaknya yang tinggi. Keperibadian dan akhlak adalah menjadi salah satu kriteria utama yang dinilai bagi melayakkan seseorang itu bergelar ʿulamaʾ serta pemikir yang dihormati dari pandangan Islam.

Ibn Qayyim adalah merupakan seorang ʿulamaʾ yang kuat beribadah kepada Allah s.w.t. Ini dinyatakan sendiri oleh murid-muridnya seperti Ibn Kathir dan Ibn Rajab al-Hanbali.

Ibn Kathīr pernah menyatakan di dalam kitabnya *al-Bidāyah wa al-Nihāyah*:

“Aku tidak pernah melihat di zaman ini orang yang lebih banyak beribadat daripada Ibn Qayyim. Beliau begitu lama sembahyang serta sentiasa memanjangkan ruku’ dan sujud”⁶³

Menurut Ibn Kathīr, Ibn Qayyim adalah seorang yang sentiasa tekun membaca al-Qur’an. Sewaktu dipenjarakan bersama-sama dengan gurunya, Ibn Taimiyyah, beliau sentiasa menghabiskan masa dengan membaca al-Qur’an dan berzikir kepada Allah.⁶⁴

Manakala Ibn Rajab menyatakan :

“Aku tidak pernah melihat orang seperti Ibn Qayyim kerana kuat beribadat dan luas ilmunya. Beliau sentiasa beribadat dan bertahajjud serta mengingati Allah dengan berzikir dan beristighfar demi kerana kasihnya kepada Allah s.w.t.”⁶⁵

al-Qanūji juga menyatakan bahawa sekiranya Ibn Qayyim sembahyang subuh, beliau akan terus berzikir sehingga hari siang.⁶⁶

Ibn Qayyim juga dikatakan seorang ‘ulama’ yang kerap mengerjakan ibadat haji. Perbuatan beliau yang banyak beribadat dan mengerjakan tawaf di Makkah

⁶³ Ibn Kathīr, *al-Bidāyah wa al-Nihāyah*, Juz. 14, hal. 235.

⁶⁴ Ibn Qayyim pernah dipenjarakan bersama-sama dengan gurunya Ibn Taimiyyah di penjara Qal’ah, Damsyik pada pertengahan bulan Sya’bān, tahun 726 H dan dibebaskan selepas kematian gurunya pada tahun 728 H. Lihat Ibn Kathīr, *op. cit.* hal. 123.

⁶⁵ Ibn Rajab, *al-Dhail ‘ala Tabaqat al-Hanābilah*, Beirut : Dār al-Ma’rifah, t.t., Juz. 2, hal. 448.

⁶⁶ al-Qanūji, *op.cit.*, hal. 140.

menyebabkan penduduk Makkah merasa kehairanan dengan ketekunannya mengerjakan ibadat tersebut.⁶⁷

Ibn Rajab menyatakan bahawa Ibn Qayyim adalah seorang yang amat tekun beribadah hinggalah beliau merasakan seolah-olah Ibn Qayyim sebagai orang yang tidak ada dosa.⁶⁸

Menurut Abd. Muṭa'āl al-Ṣā'idi, Ibn Qayyim pernah menyatakan bahawa banyak beribadah dan bersifat merendahkan diri boleh menghilangkan perasaan seseorang Muslim daripada terlalu cintakan kebendaan serta kemegahan dunia.⁶⁹

Menurut Ibn Kathīr, Ibn Qayyim adalah seorang yang baik akhlakunya. Beliau tidak bersifat hasad dengki serta tidak membenci kepada orang lain hingga menyebabkan orang ramai sayang kepadanya.⁷⁰

Ibn Qayyim juga digambarkan sebagai seorang 'ulama' yang mempunyai keperibadian yang tenang. Menurut Muhammad Muslim al-Ghunaimī, sebarang

⁶⁷ Ibn Rajab , *op. cit.*

⁶⁸ *Ibid.* Lihat juga al-Sayyid Nu'mān Khairuddin , *Jalā' al-'Ainān* , Matba'ah al-Madani, t.t.,hal. 44.

⁶⁹ Abdul Muṭa'āl al-Ṣā'idi, *al-Mujaddidūn Fī al-Islām*, Dar al-Hamāmi li al-Ṭaba'ah, t.t., hal. 304.

⁷⁰ Ibn Kathīr , *op.cit.*, hal. 234 - 235.

permasalahan yang dihadapinya akan cuba diselesaikannya dengan penuh ketenangan. Sikap sebegini amat berbeza sekali dengan sikap gurunya yang berjiwa 'pejuang'.⁷¹

Pada pandangan penulis, Ibn Qayyim berjiwa tenang kerana dipengaruhi oleh suasana zaman di mana umat Islam pada ketika itu telah pun selesai menghadapi Peperangan Salib serta telah selesai menghadapi serangan daripada tentera Tartar.⁷² Manakala zaman Ibn Taimiyyah pula, umat Islam sedang sibuk menghadapi Peperangan Salib dan juga menghadapi serangan daripada tentera Tartar.

Menurut Abd. Muta' al al-Sa'idi, Ibn Qayyim adalah seorang yang bersifat tegas dengan pendapatnya serta banyak bersabar. Beliau sanggup dipenjarakan bersama-sama dengan gurunya Ibn Taimiyyah di Penjara Qal'ah, Damsyik, demi mempertahankan pendapatnya yang bertentangan dengan pandangan pemerintah pada ketika itu.⁷³

⁷¹ Muhammad Muslim al-Ghunaimi, *Hayat al-Imam Ibn Qayyim al-Jawziyyah*, al-Maktab al-Islam, t.t., hal. 135.

⁷² Penulis akan menghuraikan tentang suasana zaman Ibn Qayyim pada bahagian senario politik.

⁷³ Abdul Muta' al al-Sa'idi, *op.cit.*

Al-Zarkālī menyatakan bahawa Ibn Qayyim amat berminat menjalankan penyelidikan dan mengumpul buku-buku. Sepanjang hayatnya, beliau telah mengumpul buku-buku hingga tidak terkira jumlahnya. Selepas beliau meninggal dunia, sebahagian daripada buku-buku tersebut dijual dan sebahagian lagi disimpan oleh anak-anaknya. Proses penjualan buku-buku tersebut memakan masa yang lama kerana jumlahnya yang banyak.⁷⁴

Abd. Muṭā' al al-Sa'īdī pula ada menyebut Ibn Qayyim tidak melibatkan diri dengan perdebatan falsafah dan juga tidak terlibat dengan perkara-perkara khurafat.⁷⁵

2.6 Kematian

Ibn Qayyim al-Jawziyyah meninggal dunia selepas azan Isya', malam Khamis 13 Rejab 751 H bersamaan dengan 1350 M⁷⁶ di Damsyik dalam usia 60 tahun.⁷⁷ Jenazahnya disembahyangkan selepas sembahyang zuhur keesokan harinya di Masjid 'Umawi dan Masjid Jarah, Damsyik. Kemudian dikebumikan di tanah perkuburan *al-*

⁷⁴ Khairuddin al-Zarkālī, *al-A'lam*, Beirut : Dār al-Ilm lil Malayīn, cet. 4, 1979, Juz. 6, hal. 56. Lihat juga Syihabuddin Ahmad b. 'Alī Ibn Ahmad b. Muhammad b. Alī b. Ahmad Ibn Ḥajar al-'Asqalānī, *al-Darār al-Kāminah*, al-Hind : Maṭbu'at Dai'rah al-Othmaniah, 1954, Juz. 3, hal. 355.

⁷⁵ Abdul Muṭā' al al-Sa'īdī, *op.cit*.

⁷⁶ Ibn Kathīr, *al-Bidāyah wa al-Nihāyah*, Juz. 12, hal. 15.

⁷⁷ *Ibid*, Juz. 14, hal. 235.

Bāb al-Ṣaḡhīr, Damsyik.⁷⁸ Menurut Ibn Kathīr, jenazah Ibn Qayyim turut diiringi oleh ramai orang termasuk para pemerintah dan para 'ulama'.⁷⁹

Beberapa 'ulama' menyebutkan bahawa sebelum Ibn Qayyim meninggal dunia, dia bermimpi berjumpa dengan gurunya, Ibn Taimiyyah. Beliau bertanya kepada gurunya, dimanakah kedudukannya dan Ibn Taimiyyah memberi isyarat bahawa kedudukannya setanding dengan para 'ulama' yang lain. Ibn Taimiyyah terus menyatakan bahawa Ibn Qayyim sekarang telah termasuk dalam kelompok *Ṭabaqāh Ibn Khuzaimah*.⁸⁰

2.7 Pandangan 'ulama' tentang ketokohan Ibn Qayyim

Ketokohan dan keperibadian Ibn Qayyim sebagai ilmuan dan pemikir Islam yang terkemuka sering disebut-sebut dan diperkatakan oleh para 'ulama' samada murid-muridnya, 'ulama' yang seangkatan dengannya atau pun 'ulama' yang hidup selepas zamannya.

Antaranya, Ibn Rajab menyatakan :

“Dia adalah seorang pakar dalam bidang ilmu tafsir, usuluddin, hadith fekah dan bahasa 'arab. Disamping itu, dia juga alim dalam bidang ilmu suluk dan perkataan ahli-ahli tasawuf”⁸¹

⁷⁸ Kubur *al-Bāb al-Ṣaḡhīr* sekarang dikenali dengan nama al-Madrasah al-Ṣabūniyyah. Sebuah kubah telah didirikan di atas makam Ibn Qayyim. Lihat Fatimah Mahjub, *al-Mausū'at al-Islamiyyah*, Juz. 2, hal. 70. Lihat juga Ibn Rajab, *al-Dhail 'alā Ṭabaqāt al-Hanābilah*, Juz. 2, hal. 450.

⁷⁹ Ibn Kathīr, *op. cit.*, hal. 235.

⁸⁰ Ibn Hajar al-'Asqalānī, *al-Darār al-Kāminah*, Juz. 3, hal. 356. Lihat juga Ibn Rajab, *al-Dhail 'alā Ṭabaqāt al-Hanābilah*, Juz.2, hal. 450 -451.

⁸¹ Ibn Rajab, *Ibid*, hal. 448.

Al-Dhahabī pernah berkata :

“Ibn Qayyim sangat mengetahui tentang ilmu hadith samada matan dan rijal hadith disamping mengetahui ilmu fekah”⁸²

Ibn Kathir pernah menceritakan tentang keilmuan Ibn Qayyim, katanya :

“Dia pakar dalam pelbagai bidang keilmuan tetapi kepakarannya terserlah dalam bidang ilmu tafsir, hadith dan ilmu usuluddin”⁸³

Ibn Hajar al-ʿAsqalānī menyebut tentang kehebatan Ibn Qayyim, katanya:

“Dia adalah seorang yang mempunyai ilmu yang banyak serta sangat mahir tentang sebarang perselisihan dalam agama dan juga mahir mengenai mazhab- mazhab dalam aliran salaf”⁸⁴

Burhanuddin al-Zarīʿie pula berkata:

“Tiada sesiapa di dunia ini yang lebih luas ilmunya daripada Ibn Qayyim”⁸⁵

Manakala Ibn Naṣr al-Dimasyqī berkata :

“Dia adalah seorang yang mahir dalam banyak disiplin ilmu khususnya di bidang ilmu tafsir dan Uṣul”⁸⁶

⁸² *Ibid.*

⁸³ Ibn Kathir , *op.cit.*, hal. 254.

⁸⁴ Ibn Hajar al-ʿAsqalānī , *op.cit.*, hal. 354.

⁸⁵ Fatimah Maḥjūb, *op.cit.*, hal. 68. Lihat Ibn Rajab, *op.cit.*, hal.449.

⁸⁶ Bakr b. Abdullah Abu Zaid , *Ibn Qayyim Hayātuhū wa Athāruhū* , hal. 30.

al-Marāghī pula berkata :

“Beliau adalah seorang ‘ulama’ Usul dan nahu yang bijaksana”⁸⁷

al-Sayūti pula berkata :

“Dia adalah seorang pengarang dan mujtahid serta tergolong dalam kumpulan ‘ulama’ yang terkemuka khususnya di bidang ilmu tafsir, hadith, Usul dan bahasa ‘arab”⁸⁸

al-Biṣār al-Dimasyqī pernah berkata :

“Beliau adalah seorang pakar tentang bahasa al-Qur’an samada uslubnya, fekahnya, syari’atnya atau pun i’jaznya”⁸⁹

Ibn Taghazzī Bardī berkata :

“Beliau adalah pakar dalam berbagai-bagai bidang ilmu seperti tafsir, fekah, bahasa ‘arab, nahu, hadith dan ilmu Usul”⁹⁰

al-Alūsī pula berkata :

“Dia adalah seorang ahli fekah mazhab Hanbali serta seorang ahli tafsir, pakar ilmu nahu, ilmu Usul dan ilmu kalam”⁹¹

Berdasarkan pandangan beberapa ‘ulama’ di atas, dapatlah dirumuskan bahawa Ibn Qayyim merupakan seorang ‘ulama’ yang menguasai banyak disiplin ilmu. Kealimannya memang diakui oleh ‘ulama’ di zamannya dan para ‘ulama’ selepasnya.

⁸⁷ *Ibid.*, hal. 31.

⁸⁸ al-Sayūti, *Bughyah al-Wu’at*, Mohammad Abu Fadl Ibrahim, Juz. 1, hal. 63.

⁸⁹ Bakr b. Abdullah Abu Zaid, *op.cit.*, hal. 31.

⁹⁰ *Ibid.*, hal. 30.

⁹¹ *Ibid.*, hal. 31.

Ketinggian ilmu dan kekuatan peribadi adalah amat bersesuaian sekali dengan sifatnya selaku seorang 'ulama' yang sudah sampai ke peringkat mujtahid dan tergolong di kalangan *kibār al-'ulama'* pada ketika itu.

2.8 Suasana di Zaman Ibn Qayyim

Ibn Qayyim al-Jawziyyah hidup antara tahun 691 H (1292 M) dan meninggal dunia pada tahun 751 H (1350 M). Ini bermakna beliau hidup di akhir abad ke tujuh H dan sebahagian peringkat awal abad ke lapan H. Latar belakang politik, masyarakat dan keilmuan di zaman ini adalah antara faktor dan motif yang mendorong perjuangan Ibn Qayyim. Dengan ini kita dapat membuat penilaian keatas segala usaha serta sumbangan yang telah beliau berikan di bidang aqidah Islamiyyah sesuai dengan suasana pada masa itu.

Sewaktu Ibn Qayyim dilahirkan pada tahun 691 H bersamaan tahun 1292 M, negeri Syam dan Mesir berada di bawah pemerintahan Kerajaan Mamālīk Bahriyyah⁹² yang berpusat di Kaherah, Mesir.

⁹² Mamalik adalah kata jama' dari perkataan '*Mamlūk*' bererti hamba-hamba atau budak-budak. Pemerintah Kerajaan Ayubiyin sebelum ini banyak membeli hamba-hamba. Kebanyakan hamba-hamba tersebut berasal dari Turki. Mereka ditempatkan di Pulau al-Raudah yang terletak di Sungei Nil (Baḥr Nīl). Istilah '*al-Bahriyyah*' adalah dimaksudkan dengan Sungei Nil. Di peringkat permulaan, hamba-hamba ini diberikan beberapa jawatan dalam pemerintahan Kerajaan Ayubiyin hingga akhirnya menyebabkan mereka merampas kuasa dan mendirikan kerajaan sendiri yang digelar 'al-Mamalik al-Bahriyyah' mengambil sempena asal usul mereka yang ditempatkan di sebuah pulau di tengah-tengah Sungei Nil. Lihat 'Ali Ibrahim Hassan, *Tarikh al-Mamalik al-Bahriyyah*, Kaherah : Maktabah al-Nahdah al-Misriyyah, cet. 3, 1967, hal. 24. Lihat juga Sa'id Abd. Fatah 'Ashur, *Misr wa al-Syam fi 'Asr al-Ayubiyin wa al-Mamalik*, Beirut: Dār al-Nahdah al-'Arabiyyah, t.t., hal. 167. Lihat juga Hamka, *Sejarah Umat Islam*, Kuala Lumpur: Pustaka Antara, cet. 2, 1977, hal . 207.

2.8.1 Senario Politik

Pada tahun Ibn Qayyim dilahirkan, beberapa wilayah Islam baru sahaja dibebaskan dari penguasaan tentera Salib oleh sultan-sultan Mamalik seperti Sultan Zahir Baybras dan Sultan Mansur Qalawun. Pada tahun ini juga Sultan Asyraf Khalil telah berjaya memerangi tentera Salib di bandar 'Akka, Beirut, Suwar, Hifa dan Qabus. Menurut 'Ali Ibrahim Hassan dengan tertawannya bandar 'Akka dan beberapa bandar lain di pesisiran pantai Syam bermakna tamatlah pemerintahan tentera Salib ke atas beberapa wilayah di negeri Syam.⁹³

Kubu terakhir tentera Salib di Pulau 'Arwa juga telah berjaya di tawan oleh tentera Islam sewaktu pemerintahan Sultan Nasir Muhammad bin Qalawūn pada bulan Muharram tahun 702 H (102 M). Dengan penawanan ini bererti tentera Salib telah berjaya dihalau keluar dari terus berada di bumi Umat Islam.⁹⁴

Dengan ini dapat dirumuskan bahawa tahun kelahiran Ibn Qayyim adalah merupakan tahun berakhirnya penguasaan tentera Salib di negeri Syam. Dengan ini beliau tidak sempat melihat kekejaman dan kezaliman tentera salib ke atas umat Islam.

⁹³ Wilayah Syam adalah antara wilayah yang penting sewaktu pemerintahan Kerajaan Mamalik Bahriyah. Pemerintah pusat telah melantik 'Naib Sultan' sebagai wakil kerajaan untuk menguruskan pentadbiran wilayah ini. Wilayah Syam mempunyai 9 daerah pentadbiran iaitu Damsyik, Halab, Safd, al-Kark, Qal'ah Damsyik, Ghazah, Hams, al-Syubak dan al-Huṣūn al-Ṣahiliyyah. Di setiap daerah ini juga dilantik seorang 'Naib Sultan' untuk menjalankan pentadbirannya. Daerah terpenting pada ketika itu ialah Damsyik. Antara Naib Sultan yang terkenal di daerah Damsyik ialah Amir Saifuddin Tankaz. Lihat 'Ali Ibrahim Hassan, *op.cit.*, hal. 283-284.

⁹⁴ 'Ali Ibrahim Hassan, *op. cit.*, hal. 182.

Jika diteliti kepada pemerintahan Kerajaan Mamālik Bahriyah, penulis mendapati sebahagian besar kehidupan Ibn Qayyim adalah sewaktu pemerintahan Sultan Nasir Muhammad bin Qalawūn yang memerintah selama 48 tahun⁹⁵. Beliau telah memerintah sebanyak tiga kali iaitu kali pertama dari tahun 693 H hingga 694 H. Pada masa ini usianya baru 9 tahun⁹⁶, kali kedua dari tahun 698 H hingga 708 H dan kali ketiga dari tahun 709 H hingga 741 H.⁹⁷ Tempoh pemerintahan Sultan Nasir adalah yang terpanjang dalam sejarah pemerintahan Kerajaan Mamālik Bahriyah.⁹⁸ Sewaktu pemerintahannya negeri Mesir dan Syam terus membangun. Ancaman tentera Monggol juga telah berakhir.⁹⁹ `Alī Ibrahim Hassan mengatakan bahawa antara faktor kejayaan pemerintahannya adalah kerana keperibadiannya yang sentiasa bersungguh-sungguh untuk membangunkan negara.¹⁰⁰ Banyak kemajuan telah dilakukannya seperti mendirikan sekolah-sekolah, masjid-masjid dan menyusun semula sistem pentadbiran.¹⁰¹ Beliau juga dikenali sebagai seorang khalifah yang kuat pegangan agamanya.¹⁰²

⁹⁵ *Ibid*, hal. 105.

⁹⁶ Saïd Abdul Fatah `Āsyur, *Miṣr wa al-Syam fī `Aṣr al-Ayubiyyīn wa al-Mamālik*, Beirut : Dār al-Nahḍah al-`Arabiyyah, t.t., hal. 22.

⁹⁷ `Alī Ibrahim Hassan, *Miṣr fī al-`Uṣūr al-Wuṣṭā min al-Faṭḥ al-`Arabi ila al-Faṭḥ al-Oṭhmānī*, Qaḥerah : Maktabah al-Nahḍah al-Miṣriyyah, cet. 5, 1964, hal. 619-620

⁹⁸ `Alī Ibrahim Hassan, *op. cit.*, hal. 113.

⁹⁹ *Ibid*, hal. 113.

¹⁰⁰ *Ibid*, hal. 113.

¹⁰¹ `Alī Ibrahim Hassan, *op. cit.*, hal. 221.

¹⁰² *Ibid*.

Disamping itu Ibn Qayyim juga sempat melihat Kerajaan Mamālik Bahriyah berada dalam zaman kelemahan khususnya sewaktu pemerintahan anak-anak Sultan Nasir Muhammad bin Qalawūn iaitu antara tahun 741 H hingga tahun 762 H.¹⁰³ Kelemahan ini berpunca daripada berlakunya perebutan kuasa kerana usia anak-anak Sultan Nasir masih muda sewaktu dilantik menjadi 'Sultan' dan tempoh pemerintahan mereka juga singkat.¹⁰⁴

Kedadaan ini berterusan sewaktu kerajaan Mamālik di bawah pemerintahan cucu-cucu Sultan Nasir.¹⁰⁵ Ibn Qayyim telah meninggal dunia sewaktu kerajaan Mamalik di perintah oleh Sultan Nasir Badruddin Abu al-Ma'ali Hassan.

¹⁰³ Ali Ibrahim Hassan, *op. cit.*, hal. 122 - 123.

¹⁰⁴ Bukti yang menunjukkan anak-anak Nasir memerintah dalam usia muda adalah sebagaimana berikut:

- i. Sultan Mansur Saifuddin Abu Bakr memerintah sewaktu berusia 20 tahun. Tempoh pemerintahannya adalah selama 3 bulan.
- ii. Sultan Asyraf 'Ala'uddin Kajak memerintah sewaktu berusia 5 atau 7 tahun (berlaku perselisihan). Tempoh pemerintahannya selama 5 bulan 10 hari.
- iii. Sultan Nasir Syihabuddin Ahmad memerintah sewaktu berusia 24 tahun. Tempoh pemerintahannya 2 bulan 12 hari.
- iv. Sultan Şoleh 'Imaduddin Ismail memerintah sewaktu berusia 17 tahun. Memerintah selama 1 tahun 10 hari.
- v. Sultan Kamil Saifuddin Sya'ban memerintah selama setahun sebulan 28 hari.
- vi. Sultan Mudzaffar Zainuddin Haji memerintah selama setahun 3 bulan.
- vii. Sultan Nasir Badruddin Abu al-Ma'ali Hassan memerintah sewaktu berusia 11 tahun. Memerintah selama 3 tahun 3 bulan 14 hari.
- viii. Sultan Şoleh Şolahuddin Şoleh memerintah sewaktu berusia 14 tahun. Memerintah selama 3 tahun 3 bulan 14 hari.
- ix. Sultan Nasir Badruddin Abu al-Ma'ali Hassan memerintah sewaktu berusia 15 tahun. Memerintah selama 6 tahun 7 bulan 7 hari (pemerintahan kali kedua).

Ibid, hal. 122 - 123.

¹⁰⁵ Cucu-cucu Sultan Nasir Muhammad bin Qalawun yang pernah memerintah ialah :

- i. Sultan Mansur Şolahuddin Muhammad b. Mudzaffar Saifuddin Haji b. Nasir Muhammad b. Qalawun. Memerintah dari 9 Jamadil Awwal 764 H hingga bulan Sya'ban 764 H. Dilantik menjadi sultan sewaktu berusia 14 tahun. Tempoh pemerintahannya selama 2 tahun 4 bulan.
- ii. Sultan Asyraf Zainuddin Abu al-Ma'ali b. Sya'ban Ibn Hassan b. Nasir Muhammad b. Qalawun. Memerintah dari bulan Sya'ban 764 H hingga 3 Zulq'adah 778 H. Mula memerintah sewaktu berusia 10 tahun. Tempoh pemerintahannya selama 14 tahun.

Oleh itu secara keseluruhannya Ibn Qayyim sempat berada dalam tiga keadaan Kerajaan Mamalik iaitu zaman permulaan, kegemilangan dan zaman kelemahan.

2.8.2 Perkembangan Keilmuan

Ilmu pengetahuan telah berkembang dengan pesat sekali sewaktu pemerintahan Kerajaan Mamalik. Mereka mengambil inisiatif untuk menjadikan negeri Mesir dan Syam sebagai pusat kegiatan ilmu. Antara kegiatan keilmuan yang dilaksanakan ialah:

- a. Mendirikan masjid. Antara masjid yang terkenal di negeri Syam sebagai pusat kegiatan ilmu ialah masjid Jami' Umawi di Damsyik. Masjid ini sentiasa diimarahkan oleh orang ramai dengan beribadat dan bacaan al-Qur'an samada pada waktu siang atau pun malam. Disamping itu majlis-majlis ilmu turut diadakan. Antara para 'ulama' yang pernah mengajar di sini ialah ¹⁰⁶:
 - i. al-Ṣolh Burhanuddin bin al-Farkah al-Syafi'e.
 - ii. al-Ṣolh Nuruddin Abu al-Yasr bin al-Soiq.
 - iii. al-Imam al-Fādhil Badruddin 'Alī al-Sakhawi al-Maliki.
 - iv. Syihabuddin bin Jahil.

iii. Sultan Mansur 'Ala'uddin 'Alī b. Asyraf Sya'ban Abu Husin b. Nasir Muhammad b. Qalawūn. Memerintah dari 8 Zulqā'idah 778 H hingga 13 Safar 783 H. Mula memerintah sewaktu berusia 6 tahun. Memerintah selama 6 tahun.

iv. Sultan Ṣoleh Zainuddin Amir b. Asyraf Ibn Husin b. Nasir Muhammad b. Qalawūn. Memerintah selama setahun 9 bulan.

Anak-anak Sultan Nasir yang memerintah adalah seramai 8 orang manakala cucu-cucunya seramai 4 orang. tempoh pemerintahan mereka adalah selama 43 tahun. Dalam tempoh ini bolehlah dikatakan Kerajaan Mamalik Bahriyah berada dalam zaman-zaman kelemahan.

Ibid, hal. 123, 133 dan 136.

¹⁰⁶ Ahmad Maḥer al-Baqari, *Ibn Qayyim min Athāruhu al-Ilmiyah*, al-Qahirah: Maktabah Nahdah, cet. 4, 1990, hal. 15 - 16.

- b. Mendirikan sekolah-sekolah. Pada tahun kelahiran Ibn Qayyim beberapa buah sekolah telah didirikan di negeri Syam seperti Madrasah *al-Zahiriyyah*¹⁰⁷, Madrasah *al-'A'iliyyah al-Kubra*¹⁰⁸, *Dār al-Hadīth*¹⁰⁹, Madrasah *al-*

¹⁰⁷ Madrasah ini telah diasaskan oleh Sultan al-Zahir pada tahun 670 H. Ianya menjadi tempat pengajian dan perhimpunan para 'ulama' fekah Mazhab Hanafi dan Syafe'i. Lihat Abd. 'Azim Abd. Salam Syarifuddin, *Ibn Qayyim al-Jawziyyah 'Asruhu wa Manhajuhu*, hal. 51.

¹⁰⁸ Menurut Muhammad Kird 'Ali, madrasah ini termasuk salah satu daripada madrasah Syafie'yyah. Menurutny terdapat 57 madrasah *Syafe'iyah* yang telah ditubuhkan di Damsyik. Madrasah ini telah diasaskan oleh Nuruddin Mahmud Zanki. Ianya telah terbakar sebanyak dua kali iaitu sewaktu serangan tentera Monggol yang diketuai oleh Ghazan pada tahun 698 H. Kebakaran kedua berlaku sewaktu kekecohan Taimur pada tahun 803 H. Lihat Muhammad Kird 'Ali, *al-Khitā' al-Syam* Beirut : Dār al-Qalam, cet. 2, 1971, Juz. 6, hal. 81 – 83.

¹⁰⁹ Menurut Muhammad Kird 'Ali, terdapat sebanyak 18 buah madrasah untuk belajar ilmu hadith telah didirikan di Syam pada ketika itu yang dikenali dengan '*Dār al-Hadīth*'. Nuruddin Mahmud bin Zanki adalah merupakan orang yang pertama mendirikan Dār al-Hadīth di Syam. Antara *Dār al-Hadīth* di Damsyik ialah :

- i. *al-Asyraqiyyah*. Didirikan pada tahun 630 H oleh Sultan Asyraf Musa b. al-'Adil. Antara 'ulama' yang pernah belajar di sini ialah Ibn Kathīr, Ibn Solāh, Imām Nawawi, Ibn Wakīl, al-Zamlakānī, al-Subkī dan lain-lain lagi.
 - ii. *Asyrafīyyah al-Barāniyyah*. Diasaskan pada tahun 643 H oleh Sultan Asyraf Mudzaffār Musa b. al-'Adil.
 - iii. *al-Bahāiyyah*. Telah diasaskan oleh Bahauddin Abī Muhammad al-Qāsim Ibn Badruddin Abī Ghalīb Mudzaffār.
 - iv. *al-Hamsiyyah*. Lebih terkenal dengan Halaqah Sahib Hams.
 - v. *al-Dawadariyyah*. Diasaskan oleh 'Alamuddin Sanjar al-Dawadar.
 - vi. *al-Samāriyyah*. Diasaskan oleh Ahmad b. Muhammad al-Baghdadi al-Samari.
 - vii. *al-Syukriyyah*. Antara 'ulama' yang pernah mengajar di sini ialah Ibn Taimiyyah dan al-Hafiz al-Dhahabi.
 - viii. *al-Syaqsiyaqiyyah*. Diasaskan oleh Naṣrullah al-Syaibānī al-Saffār.
 - ix. *al-Urwīyyah*. Diasaskan oleh Muhammad bin 'Urwah al-Mausili(m. 620 H)
 - x. *al-Fadhiliyyah*. Diasaskan oleh al-Qadhī al-Bisānī.
 - xi. *al-Qalamisiyyah*. Diasaskan oleh Abī Ya'la Hamzah al-Tamīmī.
 - xii. *al-Qausiyyah*.
 - xiii. *al-Karusiyyah*.
 - xiv. *al-Nuriyyah*. Diasaskan oleh Nuruddin Makmud b. Zankī.
 - xv. *al-Nuriyyah al-Ṣughrā*.
 - xvi. *al-Nafisiyyah*. Diasaskan oleh al-Nafis Ismail b. Muhammad al-Harānī(m. 696 H).
 - xvii. *Nasiriyyah*. Diasaskan oleh Nasir Ṣolahuddin Yusuf b. al-Mālik al-'Azīz pada tahun 654 H.
 - xviii. *al-Tankāziyyah*. Diasaskan oleh Sultan Tankiz pada tahun 728 H.
 - xix. *al-Sabābiyyah*. Diasaskan oleh Syamsuddin b. al-Sabab.
 - xxi. *al-Ma'badīyyah*. Diasaskan oleh Amir 'Alī b. Ma'bad.
- Lihat Muhammad Kird 'Alī, *Ibid*, hal. 71 – 74.

*Samsamiyyah*¹¹⁰, *Madrasah al-Jawziyyah*¹¹¹, *Madrasah al-Bariyyah*¹¹² serta Pusat Pengajian Ilmu Perubatan.¹¹³

- c. Menubuhkan perpustakaan. Kerajaan Mamalik telah menubuhkan perpustakaan-perpustakaan di kebanyakan sekolah dan masjid serta perpustakaan peribadi. Sultan Qalawun telah menubuhkan perpustakaan peribadi serta sentiasa menambahkan koleksinya dari semasa ke semasa.¹¹⁴

Menurut Muhammad Kird 'Ali di dalam *Khitāṭ al-Syām*, perpustakaan yang telah didirikan oleh Hakim Marwan Khalid bin Yazid al-'Uṁawi di Damsyik adalah merupakan perpustakaan yang pertama diasaskan dalam sejarah Islam.¹¹⁵ Pada abad ke lapan H terdapat kira-kira 18 buah perpustakaan yang mengandungi koleksi buku-buku yang bermutu di negeri Syam. Antara perpustakaan yang terkenal pada masa itu ialah¹¹⁶ :

¹¹⁰ Madrasah ini adalah salah satu daripada 4 buah madrasah Mazhab Maliki yang terdapat di Damsyik. Madrasah-madrasah lain ialah *Madrasah al-Zawiyah al-Malikiyyah*, *Madrasah al-Syarabisyyah* dan *Madrasah al-Ṣolahiyah*. Lihat *Ibid.*, hal. 96.

¹¹¹ Madrasah ini adalah salah satu daripada 12 buah madrasah Mazhab Hanbali yang terdapat di Damsyik. Madrasah ini telah diasaskan oleh Muhyiddin b. Jamaluddin b. al-Jawzi. Madrasah-madrasah lain ialah *Madrasah al-Jamusiyah*, *Madrasah al-Syarifiyyah*, *Madrasah al-Sahibah*, *Madrasah al-Ṣadriyyah*, *Madrasah al-Dhia'iyah al-Muhammadiyah*, *Madrasah al-'Umriyyah al-Syaikhiyyah*, *Madrasah al-alimah*, *Madrasah al-Masmariyyah*, *Madrasah al-Munja'iyah* dan *Madrasah al-Hanbaliyyah*. Lihat *Ibid.*, hal. 96 – 98.

¹¹² Madrasah ini adalah salah satu daripada 51 buah madrasah Mazhab Hanafi yang terdapat di Damsyik. Lihat *Ibid.*, hal. 88.

¹¹³ Di Damsyik terdapat 4 buah Pusat Pengajian Ilmu Perubatan iaitu *al-Dakhwariyyah*, *al-Rabi'iyah*, *al-Danisariyyah*, *al-Lubudiyyah*. Lihat *Ibid.*, hal. 100 – 101.

¹¹⁴ Abd. 'Azim Islahi, *Economic Concepts Of Ibn Taimiyyah*, hal. 31, ...

¹¹⁵ Hakim Marwan Khalid b. Yazid al-'Uṁawi telah meninggal dunia pada tahun 85 H. Lihat *op.cit.*, hal. 184.

¹¹⁶ *Ibid.*, hal. 188.

- i. Perpustakaan *Nasruddin al-'Asqalānī*.
- ii. Perpustakaan *Ibn Abī Usaibi`ah*.
- iii. Perpustakaan *Abī al-Fida`*
- iv. Perpustakaan *Ibn Rawāḥah al-Hamāwī*.

Para 'ulama' dan raja-raja pada zaman ini juga gemar mewakafkan buku-buku mereka kepada perpustakaan. Contohnya Raja Asyraf Musa pernah menyumbangkan buku-bukunya untuk perpustakaan Madrasah *al-'Asyrafiah* di Damsyik. Taqiyuddin al-Yaldānī juga pernah menghadiahkan buku-bukunya kepada perpustakaan *al-Faḍīliah* di Damsyik.¹¹⁷

Menurut Muhammad Kird 'Alī, Ibn Qayyim juga antara 'ulama' yang turut mengambil berat tentang perkembangan perpustakaan di zamannya.¹¹⁸ Ini menunjukkan bahawa perkembangan keilmuan telah lama bertapak di negeri Syām khususnya di Damsyik.

- d. Kemunculan ramai para 'ulama'. Suasana keilmuan pada zaman kehidupan Ibn Qayyim semakin terserlah dengan lahirnya ramai para 'ulama' serta penambahan karya-karya ilmiah. Antara para 'ulama' yang sezaman dengannya ialah :

¹¹⁷ Ibid.

¹¹⁸ Ibid.

- i. al-Dimyati atau nama penuhnya Syarafuddin Abu Muhammad Abd. Mun'im Ibn Khalaf al-Syafe'i. Meninggal dunia pada tahun 705 H.¹¹⁹
- ii. Ibn Syamah atau nama penuhnya Syamsuddin Muhammad bin Abdul Rahman Ibn Syāmiah al-Ḥanbalī. Lahir tahun 662 H dan meninggal dunia tahun 708 H.¹²⁰
- iii. al-Subki atau nama penuhnya Taqiuddin Abu al-Hassan 'Ali bin Abdul Kāfi bin Tamām bin Hamad Ibn Yahya bin Othman bin 'Alī bin Siwār bin Sālim al-Anṣārī. Meninggal dunia tahun 751 H.¹²¹
- iv. Ibn Taimiyyah yang juga merupakan guru dan 'ulama' yang paling banyak mempengaruhi pemikiran Ibn Qayyim. Meninggal dunia tahun 728 H.¹²²
- v. Safiuddin al-Hindi juga merupakan guru kepada Ibn Qayyim. meninggal dunia tahun 715 H.¹²³
- vi. Ibn Daqīq al-'Aidi atau nama penuhnya Qādhi al-Qūḍāh Taqiyuddin Ibn Daqīq al-'Aidi al-Siri al-Miṣri. Meninggal dunia tahun 704 H.¹²⁴

¹¹⁹ Abd. 'Azim Abd. Salam Syarifuddin, *Ibn Qayyim al-Jawziyyah 'Asrūhu wa Manhajūhu*, hal. 61.

¹²⁰ *Ibid*.

¹²¹ *Ibid*, hal. 62.

¹²² Muhammad Kird 'Ali menganggap beliau sebagai 'ulama' *muṣliḥ* di abad ke lapan H. Kemasyhuran kota Damsyik juga amat berkait rapat dengan peranan yang telah dimainkan olehnya. Lihat Muhammad Kird 'Ali, *al-Khiṭat al-Syam*, Juz. 4, hal. 44.

¹²³ 'Iwādullah Hijāzi, *Ibn Qayyim wa Mauqifūhu min al-Tafkīr al-Islāmī*, Kaherah: Dār al-Taḥā'ah al-Muhammadiyyah, cet. 2, 1989, hal. 29.

¹²⁴ Abdul Muṭa' al al-Sa'idi, *al-Mujaddidūn fī al-Islām min al-Qarn al-'Ulā ilā al-Rabi' 'Āsyar*, hal. 267.

- vii. Ibn Kathīr juga merupakan seorang 'ulama' terkemuka dan pernah mendapat didikan dengan Ibn Qayyim. Meninggal dunia tahun 774 H.¹²⁵
- viii. Tajuddin al-Subki atau nama penuhnya Abu Nasr Abdul Wahab bin 'Alī bin Abdul Kāfī al-Subkī al-Miṣrī al-Syāfē'ī. Meninggal dunia tahun 771 H.¹²⁶
- ix. Abu Faḍl Muhammad bin Mukram bin al-Afriqī al-Miṣrī. Terkenal dengan gelaran Jamaluddin. Meninggal dunia tahun 711 H.¹²⁷
- x. Syamsuddin al-Dhahabī. Meninggal dunia tahun 748 H.¹²⁸
- xi. 'Adūddīn al-Ijī al-Syirāzī. Meninggal dunia tahun 756 H. Beliau merupakan salah seorang fuqaha' mazhab Syāfē'ī yang terkenal.¹²⁹

Manakala karya-karya ilmiah yang ditulis oleh para 'ulama' di zaman ini juga merangkumi berbagai-bagai disiplin keilmuan. Contohnya karya-karya tulisan Ibn Taimiyyah sahaja melebihi dua ratus buah.¹³⁰ Kitab-kitab yang pernah ditulis oleh para 'ulama' selain Ibn Taimiyyah ialah :

- i. Kitab *Lisān al-'Arab* ditulis oleh Ibn Manzūr (m. 1311 M).¹³¹

¹²⁵ *Op. cit.*, hal. 31.

¹²⁶ *Ibid.*

¹²⁷ *Ibid.*, hal. 30.

¹²⁸ *Ibid.*, hal. 31.

¹²⁹ *Ibid.*, hal. 30.

¹³⁰ Muhammad Kamil Hj. Abdul Majid, *Beberapa Aspek 'Ilm Kalam Mengikut Ibn Taimiyyah*, Kuala Lumpur : Penerbit Media Ilmu, cet. 1, 1993, hal. 20.

¹³¹ Abd. 'Azim Iṣlahī, *Economic Concepts Of Ibn Taimiyyah*, London : The Islamic Foundation, 1988, hal. 33.

- ii. Kitab *Tarīkh al-Jazāri* ditulis oleh Muhammad bin Ibrahim al-Jazāri(m. 1339 M).¹³²
- iii. Kitab *al-Hawādith al-Jamī'ah* ditulis oleh Abdul al-Razzāq bin Ahmad Ibn al-Fawāti(m. 1323 M).¹³³
- iv. Kitab *al-Bidāyah wa al-Nihāyah* oleh Ibn Kathir(m. 774 H).¹³⁴
- v. Kitab *Nukhbah al-Dahr fi 'Ajāib al-Barr wa al-Baḥr* oleh Syamsuddīn Dimasyqī(m. 1326 M).¹³⁵
- vi. Kitab *Taqwīm al-Buldān* oleh Abu al-Fidā'.¹³⁶
- vii. Kitab *Mu'jam al-Buldān* oleh al-Yaqūt(m. 1229 M).¹³⁷
- viii. Kitab *Dhail Mir'at al-Zamān* oleh Musa bin Muhammad al-Yunini(m. 1326 M).¹³⁸
- ix. Kitab *Wafāyat al-A'yān wa Anbā' ahl al-Zamān* oleh Ibn Khalīkan(m. 1282 M).¹³⁹
- x. Kitab *Fawāt al-Wafāyat* oleh al-Kutubi(m. 1363 M).¹⁴⁰

¹³² *Ibid.*, hal. 32.

¹³³ *Ibid.*

¹³⁴ *Ibid.*

¹³⁵ *Ibid.*, hal. 31.

¹³⁶ *Ibid.*

¹³⁷ *Ibid.*, hal. 32.

¹³⁸ *Ibid.*

¹³⁹ *Ibid.*

¹⁴⁰ *Ibid.*

Kesimpulannya, kitab-kitab ilmiah yang ditulis oleh para 'ulama' dan cendekiawan pada zaman tersebut amat banyak. Keadaan ini menggambarkan kegiatan ilmiah adalah menjadi salah satu kegiatan penting. Sikap pemerintah yang sentiasa memberikan dorongan serta mendampingi para 'ulama' juga menjadi salah satu sebab berkembangnya kegiatan seumpama ini. Oleh itu Ibn Qayyim juga turut terpengaruh dengan suasana ini untuk sama-sama menghasilkan karya-karya ilmiah yang digunakan hingga ke hari ini.

2.8.3 Suasana Kemasyarakatan

Masyarakat Mesir dan Syām sewaktu zaman Ibn Qayyim terdiri daripada berbagai-bagai kelompok bangsa. Mereka berbeza antara satu sama lain samada dari segi watak, adat tradisi dan juga pandangan hidup. Namun demikian mereka boleh hidup bersama samada semasa aman mahu pun sewaktu perang.¹⁴¹ Antara bangsa-bangsa tersebut ialah Turki, Mesir, Syām, Tartar, Yahudi dan Armenia.¹⁴² Beberapa siri peperangan yang berlaku menyebabkan negeri Mesir dan Syām didiami oleh berbagai-bagai bangsa kerana ada di antara mereka terus menetap di negeri ini walau pun selepas peperangan berakhir.

¹⁴¹ Wan Salim Hj. Mohd. Nor dalam Sumbangan Ibn Taimiyyah Terhadap Kebangkitan Pemikiran Islam, *Islamika 11*, Kuala Lumpur: Sarjana Enterprise, cet. 1, 1992, hal. 73.

¹⁴² *Ibid.*

Menurut Sa'id Abdul Fatah 'Ashur, penduduk asal Syam dapat dibahagikan kepada dua kumpulan iaitu masyarakat bertamaddun dan masyarakat badwi atau luar bandar.¹⁴³

i. Masyarakat Bertamaddun.

Masyarakat ini terdiri daripada penduduk bandar dan kampung. Majoriti daripada mereka adalah berniaga.¹⁴⁴ Mereka menghormati dan tidak menentang Sultan-sultan kerajaan Mamalik serta gabenor-gabenor yang dilantik di negeri Syam. Mereka mengambil sikap sedemikian kerana inginkan suasana aman dan damai bagi membolehkan urusan perniagaan dan perusahaan mereka berjalan lancar. Mereka juga mengambil sikap berkecuali sekiranya berlaku pemberontakan di kalangan gabenor-gabenor terhadap pimpinan tertinggi Kerajaan Mamalik. Kehidupan masyarakat ini hanya mementingkan kegiatan ekonomi mereka. Apa yang diutamakan ialah memastikan kegiatan ekonomi mereka tidak terjejas. Mereka tidak memikirkan tentang kegiatan masyarakat-masyarakat yang lain.¹⁴⁵

¹⁴³ Sa'id Abdul Fatah 'Ashur dalam al-Mujtama' al-Islami fi Bilad al-Syam fi 'Asr al-Hurub al-Salibiyyah, *Tarikh Bilad al-Syam min al-Qarn al-Sadis ila al-Qarn al-Sabi' 'Asyar*, Amman : al-Jami'ah al-Urduniyyah, cet. 1, 1974, hal. 220. Lihat juga Sa'id Abdul Fatah 'Ashur, *Misr wa al-Syam fi 'Asr al-Ayubiyyin wa al-Mamalik*, hal. 331.

¹⁴⁴ *Ibid.*

¹⁴⁵ *Ibid.*, hal. 221 - 222.

ii. Masyarakat Badwi(Luar Bandar)

Masyarakat ini tinggal di merata tempat di seluruh negeri Syam. Kawasan tumpuan mereka adalah di sepanjang tebing Sungai Furat. Sikap mereka tidak seperti masyarakat bandar di mana mereka sering melakukan penentangan terhadap Sultan-sultan Mamalik. Penentangan tersebut berlaku kerana faktor perkauman dan keagamaan.¹⁴⁶ Antara kumpulan masyarakat ini yang sering melakukan penentangan terhadap Kerajaan Mamalik ialah :

- a. Kumpulan *al-Kasrawaniyyūn*.¹⁴⁷
- b. Kumpulan *al-Tanukhiyyūn*.¹⁴⁸
- c. Kumpulan *al-Ma'nawiyūn*.¹⁴⁹
- d. Kumpulan *al-Syihabiyyūn al-Durūz*.¹⁵⁰

¹⁴⁶ *Ibid.* , hal. 332.

¹⁴⁷ Kumpulan ini kebanyakannya tinggal di Bukit Kasrawan. Mereka terdiri daripada golongan *Nuṣairiyyah*, *Alawiyīn* dan Mutawwilah. Mereka telah melakukan beberapa siri penentangan terhadap Kerajaan Mamalik. Antaranya berpihak kepada tentera salib untuk menentang Sultan Mansur Qalawūn di Tarabulus yang berakhir dengan kekalahan mereka. Pada tahun 692 H(1292) sekali lagi mereka telah berperang dengan Kerajaan Mamalik sewaktu pemereintahan Sultan Asyraf Khalil yang berakhir dengan kemenangan pihak mereka. Penentangan mereka berakhir dengan satu pertempuran yang berlaku pada tahun 705 H(1305 M) di mana 50 ribu orang tentera Kerajaan Mamalik telah berjaya mengalahkan mereka. Tentera Kerajaan Mamalik dipimpin oleh Amir Aqwasy al-Afram. Lihat Sa'id Abdul Fatah 'Āshur , *Misr wa al-Syam fī 'Aṣr al-'Ayubiyyīn wa al-Mamālik* , hal . 333 – 334.

¹⁴⁸ Kumpulan ini terbahagi kepada dua kelompok yang besar iaitu al-Buhturiyyin and al-Arsalaniyyun. Kelompok al-Buhturiyyin tidak mempunyai pendirian yang tetap terhadap Kerajaan Mamalik kerana mereka turut membantu Kerajaan Mamalik untuk menentang tentera Tartar yang diketuai oleh Ghazan. Pada suasana yang lain mereka turut menyokong orang-orang Ayubiyyin yang ingin menubuhkan semula kerajaan mereka. Kelompok al-Arsalaniyyun menjadikan Beirut sebagai pusat gerakan mereka. Mereka memberikan sokongan padu kepada Kerajaan Mamalik Bahriyyah malah turut serta membantu untuk memerangi tentera Salib yang menjadi ancaman kepada kerajaan. *Ibid.* , hal . 335 – 336.

¹⁴⁹ Golongan al-Ma'nawiyūn atau juga digelar Banū Ma'an. Gerakan ini wujud sejak abad ke 12 M bertujuan untuk menghadapi Tentera Salib di persisiran pantai Syria. *Ibid.* , hal. 336.

¹⁵⁰ Golongan *al-Durūz* menetap di Wadi al-Tim sejak tahun 1173 M. Mereka turut memerikan sumbangan untuk mengalahkan tentera Salib dan Tartar, khususnya semasa pemerintahan Sultan Mansur Qalawūn pada tahun 1281 M. *Ibid.* , hal. 336.

e. Kumpulan *al-Mutawwilah*.¹⁵¹

f. Kumpulan *al-Nuṣairiyyah*.¹⁵²

g. Kumpulan *al-Ismā'īliyyah*.¹⁵³

Disamping itu perselisihan pendapat juga berlaku di antara kumpulan-kumpulan tersebut kerana perbezaan mazhab hinggakannya sukar untuk mencari titik pertemuan di kalangan mereka. Mazhab yang menjadi pegangan utama kebanyakan mereka ialah mazhab syi'ah yang melampau. Mereka terlalu fanatik terhadap mazhab ini hingga sampai ke tahap sanggup bekerjasama dengan tentera tartar di dalam serangan-serangan mereka ke atas negara-negara Islam. Suasana zaman yang sebegini telah mendorong Ibn Qayyim dan gurunya Ibn Taimiyyah untuk bangkit membentasi golongan-golongan ini serta membetulkan kefahaman masyarakat agar kembali merujuk kepada al-Qur'an dan al-Sunnah dalam apa-apa permasalahan agama dan tidak terlalu fanatik dengan satu-satu mazhab tertentu. Dalam hal ini, Ibn Qayyim telah menulis dua buah buku khusus untuk membentasi golongan tersebut iaitu *Al-Sawāiq al-Mursalah 'alā al-Jahmiyyah wa al-Mu'atṭilah* dan *Ijtima' al-Juyūsy al-Islamiyyah 'alā Ghazwī al-Mu'atṭilah wa al-Jahmiyyah*.¹⁵⁴

¹⁵¹ Sa'id Abdul Fatah 'Ashur menganggap sebagai golongan Syi'ah yang melampau. *Ibid.*, hal. 336.

¹⁵² Turut dikenali dengan nama *Syi'ah 'Alawiyyin*. Mereka tinggal di merata tempat di Syam tetapi pusat gerakan mereka ialah di wilayah *Misyaf*. Antara punca perselisihan mereka dengan Kerajaan Mamalik ialah kerana mereka terlampau fanatik dengan mazhab Syi'ah, mereka memberikan sokongan kewangan kepada tentera Salib dan mereka telah cukai jizyah oleh Kerajaan Mamalik. *Ibid.*, hal. 336 – 338.

¹⁵³ Turut dikenali dengan nama *Syi'ah Batiniyyah*. *Ibid.*

¹⁵⁴ Muhammad Ahmad al-Sinbati, *Manhaj Ibn Qayyim fi al-Tafsir*, al-Qahirah : Matbu'at Majma' al-Buhūth al-Islamiyyah, 1973, hal. 30.

Pada zaman ini juga pengaruh agama Kristian yang dianuti oleh tentera tartar turut menular di kalangan masyarakat Islam di Syam. Keadaan ini telah mendorong Ibn Qayyim menulis dua buah buku lagi khusus untuk mematahkan ideologi golongan tersebut iaitu *Hidāyah al-Hayāra fī al-Badd `alā al-Yahūdī wa al-Naşārā* dan *Jawābat `Abidi al-Sulbān*.¹⁵⁵

2.9 Kesimpulan

Daripada kajian suasana zaman kehidupan Ibn Qayyim, penulis dapat merumuskan bahawa zaman kehidupan Ibn Qayyim adalah merupakan zaman berakhirnya ancaman luar terhadap Kerajaan Mamālik Bahriyah di Damsyik. Masalah yang wujud dizamannya adalah merupakan beberapa pertelingkahan dalaman yang melibatkan perbezaan mazhab, khususnya mazhab Syi'ah sepertimana telah dijelaskan oleh penulis sebelum ini.

Disamping itu, Ibn Qayyim juga sempat berada di dalam zaman kelemahan Kerajaan Mamālik Bahriyah. Pada masa ini berbagai masalah dalaman telah timbul sebagaimana di dalam penjelasan sebelum ini, walaubagaimanapun tiada peperangan besar yang berlaku. Oleh itu, pada pandangan penulis, suasana yang wujud di zaman kehidupan Ibn Qayyim secara tidak langsung telah mempengaruhi sikap dan cara beliau bertindak. Sikapnya yang tenang dalam menghadapi sesuatu masalah jelas menunjukkan faktor persekitaran mempengaruhinya. Ini berbanding dengan sikap

¹⁵⁵ Ibid, hal. 30 – 31.

gurunya Ibn Taimiyyah, yang lebih agresif di mana berkemungkinan disebabkan oleh pengaruh zamannya yang sedang bergolak serta peperangan dengan tentera Salib dan Monggol.

Perselisihan mazhab di zaman Ibn Qayyim turut mendorongnya untuk menyeru kaumnya agar kembali menghayati al-Qur'an dan al-Sunnah seperti yang telah dijelaskan oleh penulis sebelum ini. Faktor ini juga telah mempengaruhi Ibn Qayyim dari segi keperibadian dan sikapnya terhadap penghayatan al-Qur'an dan al-Sunnah.